

玉  
皇  
宥  
罪  
錫  
福  
寶  
懺

玉皇宥罪錫福寶懺

具位臣某等謹虔誠上啓

說經教主元始天尊  
抱送玉帝靈寶天尊  
流演聖教降生天尊  
萬天至尊玉皇上帝  
光嚴妙樂國王聖父天尊  
寶月光皇后聖母元君  
經筵啓問無鞅真聖

侍宸捧御一切真仙

恭望

天慈。鑒臣懺悔。臣等伏聞。  
玄苑幽居。元始昇光明之座。化身來集。  
玉皇演本行之經。言往昔時。有妙  
樂國王。號淨德后寶月光。爲太子  
之未傳。敕道流而徧禱。已經半載  
。不退初心。感

太上道君。與諸至真。駕五色輦。抱一金容。毛孔放光。宮殿改色。從皇后之懇請。賜太子以繼承。生而神靈。長而慈善。人歌謠於有道。化澹洽以無爲。既捨國以付大臣。遂入山而修至道。行藥治病。助國救人。初乃證於金仙。後方成於玉帝。昔未曾有。歎莫能窮。(入意)

臣等曠劫受恩。累生蒙化。恨以愚迷之性。積成深重之愆。敢不懺陳。以干原赦。爰仰遵於教典。庸力致於悔思。祈斷障以消愆。冀禳災而集福。隨心滿願。證聖成真。方茲懺法之宣行。首望真仙之臨降。庶蒙哀憫。遂獲感通。伏願世界俱同琉璃。仙衆皆乘金碧。九色璫輪之輻輳。十絕蓋以飛揚。靈風

奏樂以相和。寶花成蓋而徧覆。鸞  
簫鳳唱。龍戲麟盤。悉翔舞於天端  
。早下臨於凡世。俾天人之悅慶。  
獲罪咎以蠲除。倘副禱祈。曷勝至  
幸。臣等下情。無任瞻望天威。拱  
俟降臨之至。誠惶誠恐。稽首頓首  
。 注 想  
尊容。諒沐垂光。謹依經念。  
高虛清明天主。所說偈章。以伸讚

歎。

金闕玄穹主

高上玉皇尊

妙相冠諸天

慈光燭三界

真聖妙道師

天人依仗師

大乘垂法語

真一指迷途

功德若虛空

讚揚無窮盡

第一讚歎

具位臣某等謹虔誠上啓

三清上聖玉帝至尊

聖父聖母至聖至真  
三寶三界一切真靈

臣等伏聞

聖德無窮。不容紀讚。凡情有感。當盡稱揚。妙見妙知。固無等倫。大慈大悲。有肴哀憫。爰按經而稱述。庶隨念以歸依。一十號強名。豈未可讚難名之號。十七光雖盡。豈能窮無盡之光。大而曰天。天亦豈



擬其倫。極而曰道。道則皆從所出。  
。雖金口尤莫能盡。豈塵世所得  
知。姑撫經言。以揚聖德。伏願口  
宣一善。在心之衆善皆生。聲讚十  
名。滿籍之罪名皆落。仁愛和遜。  
隨而增長。智慧辯才。漸可圓成。  
與諸有情。證無上道。臣等下情。  
無任懇祝之至。普與過往祖先。現  
存眷屬。塵寰品彙。長夜幽魂。傾

倒虔誠。歸依信禮。

志心朝禮

玉皇大天尊玄穹高上帝

志心朝禮

（以下每句稱和天尊聖號一拜）

舉六通力 放大光明

白玉京中 黃金闕內

七寶玄苑 大光明殿

光明座上 聖中最尊

清淨第一  
色相妙好  
長而慈善  
功成超度  
行藥治病  
廣行方便  
敷揚神功  
行忍辱故  
現希有相

身寶光燄  
幼而敏慧  
仁愛和遜  
割愛學道  
拯救衆生  
恢宣正化  
助國救人  
放大光明  
是穹蒼主

浩劫之尊  
無等無倫  
杳亡杳存  
大神通  
大丈夫  
教道無窮  
流煥法輪  
生浩劫前  
號最上乘

妙見妙知  
湛寂真靜  
上聖上靈  
光明藏  
開化人天  
大慈大悲  
玄理幽深  
運化古今  
威德希有

無量功德  
神明堅固  
名聲周徧  
神妙巍巍  
具大神通  
應現隨方  
普垂教法  
神智妙達  
大神通光

清淨自然  
威靈恢廓  
無幽不燭  
多劫行化  
分身變化  
利濟羣生  
開悟後人  
莫可度量  
大慈悲光

大 喜 捨 光  
大 平 等 光  
大 自 在 光  
大 如 意 光  
大 吉 祥 光  
大 歸 依 光  
大 圓 滿 光  
無 能 勝 光  
妙 圓 清 靜

大 忍 辱 光  
大 柔 和 光  
大 利 益 光  
大 智 慧 光  
大 解 脫 光  
大 功 德 光  
大 無 礙 光  
穹 蒼 真 老  
智 慧 辯 才

至道至尊

三界師

混元祖

無能聖主

四生慈父

高天上聖

大慈仁者

十號圓滿

萬德周身

無量度人

拔生死苦

志心皈命禮

太上彌羅無上天。妙有玄真境。渺  
渺紫金闕。太微玉清宮。無極無上

聖。廊落發光明。寂寂浩無宗。玄  
範總十方。湛寂真常道。恢漠大神  
通。

玉皇大天尊。玄穹高上帝  
讚歎已周。恭對道前。仰干除  
罪。

具位臣某等謹虔誠上啓

三清上聖玉帝至尊  
聖父聖母至聖至真



三寶三界一切真靈

臣等伏聞

造道成真。蓋本過尤之寡。從生入  
死。端由踐履之乖。性一縱。則積  
甚丘山。心一悔。則釋如冰雪。故  
本行經教之昭示。乃罪福因緣之了  
明。敢不萌於悔心。敢不收其縱性  
。投誠懇切。望聖矜憐。十惡五逆  
。隨跪拜以消除。三業六塵逐稱揚

而洗滌。不敢覆藏而自隱。悉皆首  
露以力陳。庶沐慈悲。特垂原赦。  
伏願萬目千條之罪。言下立消。多  
生歷劫之愆。道前咸滅。更盡未來  
之世。長爲無過之人。與道合真。  
去聖不遠。上及九玄七祖。普同六  
道三塗。蠢蠢羣生。茫茫下土。悉  
仗  
玉皇之德。同消曠劫之愆。寡悔寡

尤。盡善盡美。臣等下情。無任懇  
祝之至。普與過往祖先。現存眷屬  
寰品彙。長夜幽魂。傾倒虔誠。歸  
依信禮。

志心朝禮

玉皇大天尊玄穹高上帝

志心朝禮

（以下每句稱和天尊聖號一拜）

願各各明了罪福因緣

願是諸惡業悉皆消滅  
願五逆十惡悉皆消滅  
願一切惡業悉皆消滅  
願能滅惡心信向是經  
願無邊聖教累承救拔  
願上聖殊恩得離地獄  
願塵沙惡業隨心消散  
願曠劫以來罪消滅  
願縱無明性罪消滅

願六塵徧染罪消滅  
願三業縈纏罪消滅  
願肆意任心罪消滅  
願曾無覺悟罪消滅  
願日積月深罪消滅  
願背道違真罪消滅  
願順邪棄正罪消滅  
願舉心運念罪消滅  
願不孝父母罪消滅

願不敬三寶罪消滅  
願殺生偷盜罪消滅  
願邪淫妄語罪消滅  
願剛強暴惡罪消滅  
願無恭敬心罪消滅  
願出誹謗語罪消滅  
願穢手污觸罪消滅  
願葷口讀誦罪消滅  
願講習俗語罪消滅

願共生戲笑罪消滅  
願不墜地獄中罪消滅  
願不生餓鬼中罪消滅  
願不生畜生中罪消滅  
願不生邊夷外域中罪消滅

志心皈命禮

太上彌羅無上天。妙有玄真境。渺  
渺紫金闕。太微玉清宮。無極無上  
聖。廊落發光明。寂寂浩無宗。玄

範總十方。湛寂真常道。恢漠大神  
通。

玉皇大天尊。玄穹高上帝。

除罪已周。恭對道前。仰干斷  
障。

具位臣某等謹虔誠上啓

三清上聖玉帝至尊

聖父聖母至聖至真

三寶三界一切真靈



臣等伏聞

障未斷則蔽塞昏迷。礙一除則通達  
明了。陰霾去而日復晴朗。浮雲散  
而天自光輝。倘未掃除。寧免固蔽  
。心未同於天日。障當去於雲霾。  
仰元聖之垂慈。宣斷障之妙法。俾  
諸塵之無起。庶真境之自明。奈何  
凡夫之愚迷。不能按法以修習。未  
免緣情而逐境。安能澄慮以凝神。

容夫外邪。亂其至道。敗靈根而盜  
至寶。入俗網以墜凡流。萬魔來攻  
。一真逐失。倘匪沐陶鎔之德。豈  
能成斷障之功。按妙典以懺除。求  
諸障之掃蕩。爰伸懇告。悉丐矜憐  
。伏願錫智慧劍以斷除。庶煩惱障  
之消滅。掃開浮翳。使慧日之光華  
。拂拭塵勞。俾心珠之瑩徹。凡身  
清淨。道果圓成。普同幽顯之兩途

。俱識圓明之一性。永無輪轉。長  
獲逍遙。臣等下情。無任懇祝之至  
。普與過往祖先。現存眷屬。塵寰  
品彙。長夜幽魂。傾倒虔誠。歸依  
信禮。

志心朝禮

玉皇大天尊玄穹高上帝

志心朝禮

（以下每句稱和天尊聖號一拜）

願無起疑惑  
願無起淫慾  
願無起殺害  
願無起凡思  
願無起聲色  
願無起憎愛  
願無起高慢  
願無起澄慮  
願心若太虛

願無起貪嗔  
願無起嫉妬  
願無起凡情  
願無起昏垢  
願無起是非  
願無起分別  
願無起執著  
願萬神調伏  
願內外貞白

願身得清淨  
願得靚慈顏  
願普聞妙法  
願永無流轉  
願玄都記名  
願萬緣頓息  
願受持是經  
願無所不納  
願真宗不失

願超度諸難  
願咸蒙護度  
願親奉供養  
願惡根斷絕  
願諸念不生  
願捨諸妄想  
願無所不容  
願外邪不亂  
願靈根不敗

願不墜凡流  
願萬魔不攻  
願捨除結習  
願具解脫門  
願同清淨解  
願同清淨行  
願同清淨心  
願同清淨果  
願同大慈心

願不入俗網  
願得聞正法  
願修諸妙行  
願同清淨信  
願同清淨念  
願同清靜身  
願同清淨意  
願同清淨報  
願同大悲心

願奉戒專一

願冥心大道

願善護真宗

願孝養父母

願恭敬三寶

願竭忠於君

願不殺不盜

願不淫不妬

願不嗔不恨

願不驕不詐

志心皈命禮

太上彌羅無上天。妙有玄真境。渺

渺紫金闕。太微玉清宮。無極無上

聖。廓落發光明。寂寂浩無宗。玄

範總十方。湛寂真常道。恢漠大神  
通。

玉皇大天尊。玄穹高上帝。

步虛散花遶道

斷障已周。恭對道前。仰干消  
災。

具位臣某等謹虔誠上啓

三清上聖玉帝至尊  
聖父聖母至聖至真



三寶三界一切真靈

臣等伏聞。

無形無名。獨高曰道。有體有相。  
寧免乎災。天地尤有否終。日月尚  
聞薄蝕。矧爲人類。各秦凡軀。不  
能離乎數。而超乎緣。未免屬於星。而  
隨於運。前定之薄。夙緣之重。次  
舍以逆。時命以乖。豈免乎災。寧  
逃乎難。大而水火盜賊。甚則疾病

逃亡。六極五衰。七傷八難。三災  
四煞。九厄十纏。鍾於國。而國不  
能安。移於歲。而歲不能稔。兵戈  
水火。饑饉流離。既已遵奉教修。  
便當懺禳災厄。伏願咸蒙護度。悉  
獲消除。回定數而解前緣。退威星  
而平舛運。在於一己。餘殃以弭。  
而厄會以消。散及萬殊。劫運可逃  
。而洪災可免。安處塵寰。而動與

吉會。至度道岸。而無使災侵。已  
健人安。天長地久。臣等下情。無  
任懇祝之至。普與過往祖先。現存  
眷屬。塵寰品彙。長夜幽魂。傾倒  
虔誠。歸依信禮。

志心朝禮

玉皇大天尊玄穹高上帝

志心朝禮

（以下每句稱和天尊聖號一拜）

願苦惱痊平普蒙解脫  
願山神衛護猛獸自退  
願風浪頓止安穩達岸  
願是諸惡賊悉自退散  
願冤枉自伸即得解脫  
願衆邪遠避自然安穩  
願一切災殃不能侵近  
願一切重病自得痊愈  
願諸惡鬼神盡自消滅

願咒詛蠱毒皆自消滅  
願至度道岸無使災侵  
願保命度災掃除不祥  
願一切災魔自然殄滅  
願消兵戈並起之災  
願消疫氣大行之災  
願消水旱蟲蝗之災  
願消凶年饑饉之災  
願消種種惡病之災

願消疥癩癰疽之災  
願消憂悲苦惱之災  
願消橫惡所加之災  
願消牢獄繫鎖之災  
願消非命自害之災  
願消毒藥所殘之災  
願消虎痕蟲蛇之災  
願消冤債牽引之災  
願消值遇惡人之災

願消被他屠割之災  
願消推落崖岸之災  
願消邪精殘害之災  
願消水火漂焚之災  
願消刀兵誅戮之災  
願消橫喪天年之災  
志心皈命禮  
太上彌羅無上天。妙有玄真境。渺  
渺紫金闕。太微玉清宮。無極無上

聖。廓落發光明。寂寂浩無宗。玄  
範總十方。湛寂真常道。恢漠大神  
通。

玉皇大天尊。玄穹高上帝。  
消災已周。恭對道前。仰干集  
福。

具位臣某等謹虔誠上啓

三清上聖玉帝至尊  
聖父聖母至聖至真



三寶三界一切真靈

臣等伏聞。

福力崇高。始有福緣之集。善念圓  
熟。方開善瑞之臻。非天人而不成  
。惟仙徒而可繼。既未能修真之行  
。而及處仙之鄉。寧免禱求。以干  
敷錫。按妙經之所載。謂持誦而後  
能。既已歸崇。粗知習誦。罪福兩  
途。罪既除則福必蒙賜。災祥二理

。災旣消則祥必可儲。旣除罪於前  
。及消災於後。諒蒙慈憫。必徇懇  
陳。敢伸禮拜之恭。庶沐簡穰之降  
。露香懇請。望帝仁慈。伏願德湛  
龐鴻。恩施曠蕩。祥風廣扇。普萬  
物以咸庥。惠澤旁霑。覃一門之胥  
慶。五福斂錫。四海恬熙。百祥來  
介。後裔繁昌。世躋仁壽之鄉。長  
享綿延之福。如居塵外。不異玄中

。臣等下情。無任懇祝之至。普與  
過往祖先。現存眷屬。塵寰品彙。  
長夜幽魂。傾倒虔誠。歸依信禮。

志心朝禮

玉皇大天尊玄穹高上帝

志心朝禮

（以下每句稱和天尊聖號一拜）

願安樂快然神風遐著  
願貴遇人君職務遷轉

願財寶充溢衣食自然  
願慶流子孫傳之後代  
願是諸惡星返降吉祥  
願心欲願者一切如意  
願衣食自然子孫榮貴  
願出言希聞所至恭敬  
願顯貴崇重光大其門  
願吉祥熾盛災障不侵  
願道根深重夙有善緣

願宿植德本廣種福田  
願心有所請一切應奉  
願仙丹妙寶隨意所取

志心皈命禮

太上彌羅無上天。妙有玄真境。渺  
渺紫金闕。太微玉清宮。無極無上  
聖。廓落發光明。寂寂浩無宗。玄  
範總十方。湛寂真常道。恢漠大神  
通。

玉皇大天尊。玄穹高上帝。  
集福已周。恭對道前。仰干滿  
願。

具位臣某等謹虔誠上啓

三清上聖玉帝至尊  
聖父聖母至聖至真  
三寶三界一切真靈

臣等伏聞。

衆寧無願。惟所願之不同。人各有

心。豈其心之可一。墜者欲昇。而  
賤者欲貴。貧者欲富。而苦者欲安  
。或求證道成真。或務濟民利物。  
各有所求。豈無願者。必待其滿。  
而後釋然。仰惟妙道垂慈。能遂衆  
生所願。敢以虔祈。仰干孚佑。伏  
願俯察凡情。特垂天聽。隨機赴感  
。應念從心。或利己利他。或爲幽  
爲顯。悉令志滿。毋使願違。臣等

下情。無任懇祝之至。普與過往祖先。現存眷屬。塵寰品彙。長夜幽魂。傾倒虔誠。歸依信禮。

志心朝禮

玉皇大天尊玄穹高上帝

志心朝禮

（以下每句稱和天尊聖號一拜）

願天下歌謠欣國太平  
願地獄衆生化生諸天



願三惡道苦一時解脫  
願普爲十方演說諸法  
願普爲十方照燭法界  
願六凡四聖普叨道蔭  
願聖賢慶集普天興隆  
願國土清平人民樂業  
願凶寇自息邊域不爭  
願運推數周正道當行  
願一切枯稿復生枝葉

願短命衆生各得長壽

願六道衆生普蒙開度

願一切天人五衰四相永得除滅轉增

天福

願王臣兆庶即得人天長壽之樂

願身或滅度乃得脫殼尸解之道

願一切諸魔安處天宮鬪戰之苦各得

休息

願一切衆生離地獄苦得淨土樂

願一切餓鬼即得飽滿無飢渴惱  
願一切畜生脫畜生苦得智慧樂

志心皈命禮

太上彌羅無上天。妙有玄真境。渺  
渺紫金闕。太微玉清宮。無極無上  
聖。廓落發光明。寂寂浩無宗。玄  
範總十方。湛寂真常道。恢漠大神  
通。  
玉皇大天尊。玄穹高上帝。

滿願已周。恭對道前。仰干成  
真。

具位臣某等謹虔誠上啓

三清上聖玉帝至尊  
聖父聖母至聖至真  
三寶三界一切真靈

臣等伏聞。

求道未勤。豈能成道。修真有素。  
自可成真。諦觀本行之經。深貴能

持之者。凡讀是經。可稱真人之號。  
。若習其奧。必蒙仙道之成。既再  
三懇請。而斷障消災。當究竟證悟  
。而造玄入妙。爰伸懺謝。以丐周  
成。伏願道炁咸臻。天福益固。超  
沉尸而起飛魄。遊聖域而聽法音。  
身處五雲。神超八極。千靈敬仰。  
萬神懾伏。三界侍衛。五帝司迎。  
不失人身。克成真道。上資家國。

下及民生俱入法門。同登道岸。臣  
等下情。無任懇祝之至。普與過往  
祖先。現存眷屬。塵寰品彙。長夜  
幽魂。傾倒虔誠。歸依信禮。

志心朝禮

玉皇大天尊玄穹高上帝

志心朝禮

（以下每句稱和天尊聖號一拜）

願一切人民咸臻道炁

願白首面皺皆得化度紺髮朱顏  
願少壯幼稚轉增形容光澤美好  
願枯骨更生沉尸飛魄皆起復形  
願得生十方諸大天宮  
願仰朝上帝各到道前  
願嬉遊聖域餐聽法音  
願依教奉行登真成道  
願一切玉女持幢下迎  
願獲宿命通遵奉大道

願展轉修持至登道岸  
願神遷淨土蓮花化生  
願了悟生死深入山林  
願天魔外道悉皆懾伏  
願自在逍遙號人中聖  
願德慧長新同諸真人  
願坐招自然天福益固  
願身度三界與道長存  
願得爲九天眞仙之人



願天真御几玉妃拂筵  
願萬神班列諸天臨軒  
願三界侍衛五帝司迎  
願身處五雲光明赫奕  
願上昇天宮衆真下迎  
願頓得超證無上妙道  
願五帝輔翼召使羣仙  
願御役神官運導陰陽  
願千靈敬仰萬神懾伏

願百邪避路羣魔束形  
願逍遙自在與道長存  
願得證功德身一切有情被其蔭故  
願得證神通身一切吉祥咸臻集故  
願得證清淨身是諸惡業不能侵故  
願得證威德身天魔外道不能攝故  
願得證無等身上帝遙唱萬神敬故  
願得證堅固身惡劫大難不能損故  
願得證道藏身口出語言鬼神仰故

願得證慈悲身六道衆生賴其善故  
願得證大道身出入所在無怖畏故  
願得證良醫身善行妙法安樂人故  
願得證光明身常爲帝光所攝受故  
願得證自在身天宮妙境神能遊故  
志心皈命禮  
太上彌羅無上天。妙有玄真境。渺  
渺紫金闕。太微玉清宮。無極無上  
聖。廓落發光明。寂寂浩無宗。玄

範總十方。湛寂真常道。恢漠大神  
通。

玉皇大天尊。玄穹高上帝。  
成真已周。恭對道前。仰干結  
意。

具位臣某等謹虔誠上啓

三清上聖玉帝至尊  
聖父聖母至聖至真  
三寶三界一切真靈

臣等伏聞。

玉帝功德大。能救度於衆生。凡俗  
罪愆深。敢皈投於洪造。既極稱揚  
之力。復伸懺謝之誠。諒沐慈悲。  
特垂赦宥。罪福之緣。可得明了。  
障礙之因。悉皆斷除。保命度災。  
延祥集福。在心之願得滿。修真之  
道可成。豈匪因緣。實爲慶幸。尚  
賴始終之鑒佑。必令懇禱之昭通。

無願不從。有求皆應。保天長存。  
而昌運再啓。致國太平。而凶寇自  
息。九幽破壞。長夜光明。五福歛  
錫。兆民歌唱。祖禰昇度。眷屬壽  
康。財寶充溢。而衣食自然。子孫  
榮貴。而吉祥熾盛。善芽增長。道  
果圓成。等與羣生。普沾聖澤。臣  
等下情。無任懇祝之至。誠惶誠恐  
。稽首頓首。謹言。

大哉至道  
無宗上真  
上度諸天  
下濟幽魂  
上無師祖  
惟道爲身  
丹臺紫府  
金闕玉京  
祕此妙法  
溥福含靈  
滅我萬罪  
增我遐齡  
萬神朝禮  
魔王保迎  
功德昌盛  
黃籙書名  
渺渺億劫  
使我長存

第十回向

向來禮懺功德。無量殊勳。謹以歸命。

說經教主元始天尊  
抱送玉帝靈寶天尊  
流演聖教降生天尊  
萬天至尊玉皇上帝  
光嚴妙樂國王聖父天尊  
寶月光皇后聖母元君



經筵啓問無鞅眞聖  
侍宸捧御一切眞仙恭望  
天慈鑒臣懺謝。伏願凡情。通感上  
帝。鑒觀障業斷除。丹悃遙聞於滿  
願。吉祥駢集。眞旂獲遂於圓成。  
九祖超昇。闔門康泰。身心清淨。  
處世長年。咸賴善功。成無上道。  
一切信禮。爲上良因。再伸稱念。  
三清應化天尊。

。 玉光普照天尊。 覃恩不可思議功德。

玉皇宥罪錫福寶懺竟

玉皇本願經跋

粵自網緼醇而內景作崆峒問道之言尚矣厥後青牛  
授訣白鹿曜靈蕊珠大宗騰於生生不已惟道無名非  
擬議而顯妙道無聲臭因罔象以成真不生不滅恬澹  
自然洗心絕念濯垢守一斯天無爲而長地無爲而久  
人無爲而壽故皇矣

上帝首出庶物統握綱維天關在手地軸由心任五行運  
用時物不能轉其機隨四序消長行生莫能逆其化雍  
雍熙熙日游於穆之表迺眷願下土軫卹流浪遂廣德  
教玉音振而龍章頓啓琳鍾鳴而妙諦偕宣使修真之  
士循次而入凡

上帝之精神命脉與所以進德修業固無不括於本願經  
而爲體物不可遺昔司馬子微讀天隱三年親示口訣  
位置瓊臺此誠無往不豁也今讀是經而能以誠爲入

道之門以默爲守道之基以柔爲用道之本安知  
上帝不大放光明挈十彙而奠位育携流而棲澹漠也哉  
伏願沉涵大衆拂飾盡性以有入無陟玉庭而飲金漉  
順運隨會予亦總靈轡而歌無疆矣

青華洞天嗣派翼教無極都雷府主牘金闕巡行御史  
毅忍真人臣程澄一俗名文斌薰沐叩跋并書

番禺伍流光堂李氏偕孫福如東海曾孫壽比南山敬梓於羊城粵

秀山

三元宮虔造施送 時同治元年孟春吉旦

敬刊

玉皇宥罪錫福寶懺樂助印刷費善長芳名（恕乏尊稱）

稱

元	陳家永捐壹佰元	鄭燦基捐貳佰元	吳堅捐貳佰元	梁鵬捐貳佰元	林海捐貳佰元	王英傑捐貳佰元	盧徐美蓮捐貳佰元	盧劉桂珍捐貳佰元	盧忠傑捐貳佰元	盧忠興捐貳佰元	慶雲古洞捐貳佰元	吳楚明捐貳佰元	陳欽捐叁佰元	招祖幹招家栢共捐伍佰元	何清泉捐伍佰元	吳耀東捐壹仟元
	陳家豪捐壹佰元	老蕃蓮捐壹佰元	戴謙捐貳佰元	崔顯輝捐貳佰元	李添成捐貳佰元	王潔瑩捐貳佰元	盧坤儀捐貳佰元	盧關慈活捐貳佰元	盧忠耀捐貳佰元	盧忠良捐貳佰元	盧葦生捐貳佰元	姜德明捐貳佰元	陳成昌捐叁佰元		葉志記捐伍佰元	吳國佺捐壹仟元

黃鴻醒捐壹佰元	陳思明捐壹佰元	陳志明捐壹佰元	崔湛捐壹佰元	何國賢捐壹佰元	甘南捐壹佰元	趙不動捐壹佰元	程其光捐壹佰元	陳霖捐壹佰元	李達泉捐壹佰元	李威捐壹佰元	何俊賢捐壹佰元	何燧成捐壹佰元	郭順修捐壹佰元	黃高宣捐壹佰元	蔡標蓮捐壹佰元
黃輝醒捐壹佰元	陳瑞意捐壹佰元	陳忠明捐壹佰元	陳盧妹捐壹佰元	何贊宗捐壹佰元	朱潤海捐壹佰元	梁家聲捐壹佰元	梁勤捐壹佰元	鍾坤捐壹佰元	崔泰林捐壹佰元	趙耀捐壹佰元	陸文德捐壹佰元	何昭成捐壹佰元	旭照 <sub>有限公司</sub> 捐壹佰元	劉崇然捐壹佰元	梁佳蓮捐壹佰元

潘性醒捐壹佰元	黃考覺捐壹佰元	陳成興捐壹佰元	陳成就捐壹佰元
溫簡覺捐壹佰元	溫榮覺捐壹佰元	歐陽慧知捐壹佰元	司徒基知捐壹佰元
陳裕覺捐壹佰元	崔堅覺捐壹佰元	黃廣知捐壹佰元	梁羣知捐壹佰元
盧康醒捐壹佰元	鍾泉醒捐壹佰元	黃柱覺捐壹佰元	王煜知捐壹佰元
鍾興知捐壹佰元	楊明知捐壹佰元	黎勝蓮捐壹佰元	麥勤修捐壹佰元
梁道知捐壹佰元	林亮知捐壹佰元	徐劭蓮捐壹佰元	何美儀捐壹佰元
黃浩知捐壹佰元	陳心知捐壹佰元		

以上捐助印刷費合共港幣壹萬肆仟肆佰元正。

另由敬刊太上三元寶懺，三元滅罪水懺，正陽仁風寶懺結餘轉來港幣貳仟叁佰肆拾元

以上兩項合計港幣壹萬陸仟柒佰肆拾元整。

支崔顯記承印壹仟本  
印刷費壹萬陸仟柒佰肆拾元正 貨銀兩。

(非賣品)

歡迎翻印 功德無量 流通傳誦 福有攸歸 送經處：(一) 香港大道西335號廿二樓雲泉仙館有限公司

道歷四六八八年歲次辛未孟夏香港雲泉仙館版 (二) 電話：五一四七二五六九 五一四〇九九七七  
新界粉嶺坪輦路大埔田村 雲泉仙館道教圖書室